

大方等如来藏经

东晋北天竺三藏法师佛陀跋陀罗译



南無本師釋迦牟尼佛

说 明

本简体校正版《大方等如来藏经》电子书，根据《乾隆大藏经》大乘单译经，第 0380 部，东晋北天竺三藏法师佛陀跋陀罗译《大方等如来藏经》原藏影印本校正，句读仅供参考。

本电子书是免费结缘品。特此说明。

仁慧草堂

二〇一八年九月

● 起诵仪

香赞

(一遍)

炉香乍爇. 法界蒙薰. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

开经偈

(一遍)

无上甚深微妙法 百千万劫难遭遇
我今见闻得受持 愿解如来真实义

大方等如来藏经

东晋北天竺三藏法师佛陀跋陀罗译¹

如是我闻：

一时，佛在王舍城耆闍崛山²宝月讲堂栴檀重阁，成佛十年，与大比丘众百千人俱，菩萨摩訶萨六十恒河沙，皆悉成就大精进力，已曾供养百千亿那由他诸佛，皆悉能转不退法轮，若有众生闻其名者，于无上道终不退转，其名曰：法慧菩萨、师子慧菩萨、金刚慧菩萨、金刚藏菩萨³、调慧菩萨、妙慧菩萨、月光菩萨、宝月菩萨、满月菩萨、勇猛菩萨、无量勇菩萨、无边勇菩萨、超三界菩萨、观世音菩萨、大势至菩萨、香象菩萨、香上菩萨、香首上菩萨⁴、首藏菩萨、日藏菩萨、幢相菩萨、大幢相菩萨、离垢幢菩萨、无边光菩萨、放光菩萨、离垢光菩萨、喜王菩萨、常喜菩萨、宝手菩萨、虚空藏菩萨、离憍慢菩萨、须弥山菩萨、光德王菩萨、总持自在王菩萨、总持菩萨、灭众病菩萨、疗一切众生病菩萨、欢喜念菩萨、履意菩萨、常履菩萨、普照菩萨、月明

¹ 大正藏：东晋天竺三藏佛陀跋陀罗译

² 大正藏：佛在王舍城耆闍崛山中

³ “金刚藏菩萨”大正藏及丽藏本无；永乐北藏及龙藏本有

⁴ 大正藏：香上首菩萨

菩萨、宝慧菩萨、转女身菩萨、大雷音菩萨、导师菩萨、不虚见菩萨、一切法自在菩萨、弥勒菩萨、文殊师利菩萨，如是等六十恒河沙菩萨摩訶萨，从无量佛刹，与无央数天、龙、夜叉、乾闥婆、阿修罗、迦楼罗、紧那罗、摩睺罗伽俱，悉皆来集尊重供养。

尔时，世尊于栴檀重阁正坐三昧而现神变，有千叶莲华大如车轮，其数无量，色香具足而未开敷，一切花内皆有化佛，上升虚空弥覆世界，犹如宝帐，一一莲花放无量光，一切莲花同时舒荣。佛神力故，须臾之间皆悉萎变，其诸花内一切化佛结加趺坐，各放无数百千光明，于时此刹庄严殊特，一切大众欢喜踊跃，怪未曾有，咸有疑念：“今何因缘无数妙花忽然毁变，萎黑臭秽，甚可厌恶⁵？”

尔时，世尊知诸菩萨大众所疑，告金刚慧：“善男子，于佛法中诸有所疑，恣汝所问。”

时，金刚慧菩萨知诸大众咸有疑念，而白佛言：“世尊！以何因缘无数莲花中皆有化佛，上升虚空弥覆世界，须臾之间皆悉萎变？一切化佛各放无数百千光明，众会悉见，合掌恭敬？”

⁵ 大正藏：甚可恶辱

尔时金刚慧菩萨，以偈颂曰：

我昔未曾睹 神变若今日
见佛百千亿 坐彼莲花藏
各放无数光 弥覆一切刹
离垢诸导师 庄严诸世界
莲花忽萎变 莫不生厌恶⁶
今以何因缘 而现此神变⁷
我睹恒沙佛 及无量神变
未曾见如今 愿为分别说

尔时，世尊，告金刚慧及诸菩萨言：“善男子，有大方等经名如来藏，将欲演说故现斯瑞，汝等谛听，善思念之。”

咸言：“善哉！愿乐欲闻。”

佛言：“善男子，如佛所化无数莲花忽然萎变，无量化佛在莲花内，相好庄严，结加趺坐，放大光明，众睹希有，靡不恭敬。如是，善男子，我以佛眼观一切众生，贪欲恚痴，诸烦恼中，有如来智、如来眼、如来身，结加趺坐，俨然不动。善男子，一切众生虽在诸趣，烦恼身中有如来藏，常无染污，德相备足，如我无异。又善男子，譬

⁶ 大正藏：甚可恶辱

⁷ 大正藏：化

如天眼之人观未敷花，见诸花内有如来身结加趺坐，除去萎花便得显现。如是，善男子，佛见众生如来藏已，欲令开敷为说经法，除灭烦恼显现佛性。善男子，诸佛法尔，若佛出世若不出世，一切众生如来之藏常住不变，但彼众生烦恼覆故。如来出世广为说法，除灭尘劳净一切智。善男子，若有菩萨信乐此法，专心修学，便得解脱，成等正觉，普为世间施作佛事。”

尔时，世尊以偈颂曰：

譬如萎变花 其花未开敷
天眼者观见 如来身无染
除去萎花已 见无碍导师
为断烦恼故 最胜出世间
佛观众生类 悉有如来藏
无量烦恼覆 犹如秽花缠
我为诸众生 除灭烦恼故
普为说正法 令速成佛道
我以⁸佛眼见 一切众生身
佛藏安隐住 说法令开现

“复次，善男子，譬如淳蜜在岩树中，无数群蜂围绕守护。时有一人，巧智方便，先除彼蜂

⁸ 大正藏：已

乃取其蜜，随意食用惠及远近。如是，善男子，一切众生有如来藏，如彼淳蜜在于岩树，为诸烦恼之所覆蔽，亦如彼蜜群蜂守护。我以佛眼如实观之，以善方便随应说法，灭除烦恼开佛知见，普为世间施作佛事。”

尔时，世尊以偈颂曰：

譬如岩树蜜 无量蜂围绕
巧方便取者 先除彼群蜂
众生如来藏 犹彼⁹岩树蜜
结使尘劳缠 如群蜂守护
我为诸众生 方便说正法
灭除烦恼蜂 开发如来藏
具足无碍辩 演说甘露法
普令成正觉 大悲济群生

“复次，善男子，譬如秬粱¹⁰未离皮糲，贫愚轻贱谓为可弃，除荡既精常为御用。如是，善男子，我以佛眼观诸众生，烦恼糠糲覆蔽如来无量知见，故以方便如应说法，令除烦恼净一切智，于诸世间为最正觉。”

尔时，世尊以偈颂曰：

⁹ 大正藏：如

¹⁰ 大正藏：粳粮

譬一切粃梁¹¹ 皮糲未除荡
贫者犹贱之 谓为可弃物
外虽似无用 内实不毁坏
除去皮糲已 乃为王者膳
我见众生类 烦恼隐佛藏
为说除灭法 令得一切智
如我如来性 众生亦复然
开化令清净 速成无上道

“复次，善男子，譬如真金堕不净处，隐没不见¹²经历年载，真金不坏而莫能知。有天眼者语众人言：‘此不净中有真金宝，汝等出之随意受用。’如是，善男子，不净处者无量烦恼是，真金宝者如来藏是，有天眼者谓如来是。是故如来广为说法，令诸众生除灭烦恼，悉成正觉施作佛事。”

尔时，世尊以偈颂曰：

如金在不净 隐没莫能见
天眼者乃见 即以告众人
汝等若出之 洗除¹³令清净
随意而受用 亲属悉蒙庆

¹¹ 大正藏：粃粮

¹² 大正藏：现

¹³ 大正藏：涤

善逝眼如是 观诸众生类
烦恼淤泥中 如来性不坏
随应而说法 令办一切事
佛性烦恼覆 速除令清净

“复次，善男子，譬如贫家有珍宝藏，宝不能言：‘我在于此。’既不自知又无语者，不能开发此珍宝藏，一切众生亦复如是。如来知见、力、无所畏，大法宝藏在其身内，不闻不知耽惑五欲，轮转生死受苦无量。是故诸佛出兴于世，为开身内如来法藏，彼即信受净一切智，普为众生开如来藏，无碍辩才为大施主。如是，善男子，我以佛眼观诸众生有如来藏，故为诸菩萨而说此法。”

尔时，世尊以偈颂曰：

譬如贫人家 内有珍宝藏
主既无¹⁴知见 宝又不能言
穷年抱愚冥 无有示语者
有宝而不知 故常致贫苦
佛眼见¹⁵众生 虽流转五道
大宝在身内 常存¹⁶不变易
如是观察已 而为众生说

¹⁴ 大正藏：不

¹⁵ 大正藏：观

¹⁶ 大正藏：在

令得知¹⁷宝藏 大富兼广利
若信我所说 一切有宝藏
信勤方便行 疾成无上道

“复次，善男子，譬如菴罗果内种¹⁸不坏，种之于地成大树王。如是，善男子，我以佛眼观诸众生，如来宝藏在于无明壳¹⁹，犹如果种在于核内。善男子，彼如来藏清凉无热，大智慧聚妙寂泥洹，名为如来、应供、等正觉。善男子，如来如是观众生已，为菩萨摩訶萨说开净佛智故²⁰，显现此义。”

尔时，世尊以偈颂曰：

譬如菴罗果 内实不毁坏
种之于大地 必成大树王
如来无漏眼 观一切众生
身内如来藏 如花果中实
无明覆佛藏 汝等应信知
三昧智具足 一切无能坏
是故我说法 开彼如来藏
疾成无上道 如果成树王

“复次，善男子，譬如有人持真金像，行诣

¹⁷ 大正藏：智

¹⁸ 大正藏：实

¹⁹ 大正藏：壳

²⁰ 大正藏：为菩萨摩訶萨净佛智故

他国，经由险路，惧遭劫夺，裹以弊物，令无识者。此人于道忽便命终，于是金像弃捐旷野，行人践踏咸谓不净。得天眼者见弊物中有真金像，即为出之一切礼敬。如是，善男子，我见众生种种烦恼，长夜流转生死无量，如来妙藏在其身内，俨然清净如我无异。是故佛为众生说法，断除烦恼净如来智，转复化导一切世间。”

尔时，世尊以偈颂曰：

譬人持金像 行诣于他国
裹以弊秽物 弃之在旷野
天眼者见之 即以告众人
去秽现真像 一切大欢喜
我天眼亦然 观彼众生类
恶业烦恼缠 生死备众苦
又见彼众生 无明尘垢中
如来性不动 无能毁坏者
佛既见如是 为诸菩萨说
烦恼众恶业 覆蔽²¹最胜身
当勤净除断 显出如来智
天人龙鬼神 一切所归仰

“复次，善男子，譬如女人贫贱丑陋，众人

²¹ 大正藏：弊

所恶而怀贵子，当为圣王王四天下。此人不知经历时节，常作下劣生贱子想。如是，善男子，如来观察一切众生，轮转生死受诸苦毒，其身皆有如来宝藏，如彼女人而不觉知。是故如来普为说法，佛言²²：‘善男子，莫自轻鄙，汝等自身皆有佛性，若勤精进灭众过恶，则受菩萨及佛²³尊号，化导济度无量众生。’”

尔时，世尊以偈颂曰：

| | |
|-------|-------|
| 譬如贫女人 | 色貌甚庸陋 |
| 而怀贵相子 | 当为转轮王 |
| 七宝备众德 | 王有四天下 |
| 而彼不能知 | 常作下劣想 |
| 我观诸众生 | 婴苦亦如是 |
| 身怀如来藏 | 而不自觉知 |
| 是故告菩萨 | 慎勿自轻鄙 |
| 汝身如来藏 | 常有济世明 |
| 若勤修精进 | 不久坐道场 |
| 成最正觉道 | 度脱无量众 |

“复次，善男子，譬如铸师铸真金像，既铸成已，则²⁴置于地，外虽焦黑内像不变，开模出

²² 大正藏：言；永乐北藏及龙藏：佛言

²³ 大正藏：世

²⁴ 大正藏：倒

像金色晃曜。如是，善男子，如来观察一切众生，佛藏在身众相具足。如是观已广为显说，彼诸众生得息清凉，以金刚慧摧²⁵破烦恼，开净佛身如出金像。”

尔时，世尊以偈颂曰：

譬如大冶铸 无量真金像
愚者自外观 但见焦黑土
铸师量已冷 开模令质现
众秽既已除 相好划²⁶然显
我以佛眼观 众生类如是
烦恼淤泥中 皆有如来性
授以金刚慧 摧²⁷破烦恼模
开发如来藏 如真金显现
如我所观察 示语诸菩萨
汝等受善持²⁸ 转化诸群生

尔时，世尊告金刚慧菩萨摩诃萨：“若出家在家²⁹善男子善女人，受持读诵、书写供养、广为人说如来藏经，所获功德不可计量。金刚慧，若有菩萨为佛道故，勤行精进，修习神通，入诸

²⁵ 大正藏：搥

²⁶ 大正藏：画

²⁷ 大正藏：搥

²⁸ 大正藏：汝等善受持

²⁹ 大正藏：若出家、若在家

三昧，欲植诸德本³⁰，供养过去恒河沙现在佛³¹，造恒河沙³²七宝台阁，高十由旬，纵广正等各一由旬，设七宝床敷以天缯，为一佛日日造立过恒河沙七宝台阁，以用奉献一一如来及诸菩萨声闻大众。以如是事，普为一切过恒河沙现在诸佛，如是次第乃至过五十恒沙众宝台阁，以用供养过五十恒沙现在诸佛及诸菩萨声闻大众，乃至无量百千万劫。金刚慧，不如有人乐喜菩提，于如来藏经受持、读诵、书写、供养乃至一譬喻者。金刚慧，此善男子，于诸佛所种诸善根福虽无量，比善男子、善女人所得功德，百分不及一，千分不及一，乃至算数譬喻所不能及。”

尔时，世尊重说偈言：

若人求菩提 闻持此经者
书写而供养 乃至于一偈
如来微妙藏 须臾发随喜
当听此正教 功德无有量
若人求菩提 住大神通力
资³³供十方佛 菩萨声闻众
其数过恒沙 亿载不思议

³⁰ 大正藏：欲殖德本

³¹ 大正藏：供养过恒河沙现在诸佛

³² 大正藏：造过恒河沙

³³ 大正藏：欲

为一一诸佛 造立妙宝台
台高十由旬 纵广四十里
中施七宝座 严饰备众妙
敷以天缯褥 随座各殊异
无量过恒沙 献佛及大众
悉以此奉献 日夜不休息
满百千万劫 所设³⁴福如是
慧者闻此经 能持一譬喻
而为人解说 其福过于彼
乃至算数 譬喻所不及
众生之所依 速成无上道
菩萨谛思惟 甚深如来藏
知众生悉有 疾成无上道

尔时，世尊复告金刚慧菩萨言：“过去久远无量无边不可思议阿僧祇劫，复过是数，尔时有佛，号常放光明王如来、应供、等正觉、明行足、善逝、世间解、无上士、调御丈夫、天人师、佛、世尊。金刚慧，何故名曰常放光明王？彼佛本行菩萨道时，降神母胎常放光明，彻照十方诸³⁵佛世界微尘等刹。若有众生见斯光者，一切欢喜，

³⁴ 大正藏：获

³⁵ 大正藏：千

烦恼悉灭，色力具足，念智成就，得无碍辩。若地狱、饿鬼、畜生、阎罗王、阿修罗等见光明者，皆离恶道，生天人中。若诸天入见光明者，于无上道得不退转，具五神通。若不退转者，皆得无生法忍五十功德旋陀罗尼。金刚慧，彼光明所照国土，皆悉严净如天琉璃，黄金为绳以界八道，种种宝树花果茂盛，香气芬馨，微风吹动出微妙音，演畅三宝菩萨功德，根、力、觉、道、禅定、解脱。众生闻者，皆得法喜，信乐坚固，永离恶道。金刚慧，彼十方刹一切众生蒙光明故，昼夜六时合掌恭敬。金刚慧，彼菩萨处胎出生，乃至成佛、无余泥洹，常放光明，般泥洹后舍利塔庙亦常放光，以是因缘，诸天世人号曰常放光明王。

“金刚慧，常放光明王如来、应供、等正觉初成佛时，于其法中有一菩萨名无边光，与三³⁶十亿菩萨以为眷属。无边光菩萨摩訶萨于彼佛所，问如来藏经，佛为演说，在于一坐经五十大劫，护念一切诸菩萨故，其音普告十佛世界微尘等百千佛刹，为诸菩萨无数因缘百千譬喻，说如来藏大乘经典。诸菩萨等闻说此经，受持读诵，如说修行，除四菩萨皆已成佛。金刚慧，汝莫异观，

³⁶ 大正藏：二

彼无边光菩萨岂异人乎？即汝³⁷身是。彼四菩萨未成佛者，文殊师利、观世音、大势至、汝金刚慧是。金刚慧，如来藏经能大饶益，若有闻者皆成佛道。”

尔时，世尊重说偈言³⁸：

过去无数劫 佛号光明王
常放大光明 普照无量土
无边光菩萨 于佛初成道
而启问此经 佛即为演说
其有遇最胜 而闻此经者
皆已得成佛 唯除四菩萨
文殊观世音 大势金刚慧
此四菩萨等 皆曾闻此经³⁹
金刚慧为彼 第一神通子
时号无边光 已曾闻此经
我本求道时 师子幢佛所
亦曾受斯经 如闻说修行
我因此善根 疾得成佛道
是故诸菩萨 应持说此经
闻已如说行 得佛如我今

³⁷ 大正藏：我

³⁸ 大正藏：曰

³⁹ 大正藏：法

若持此经者 当礼如世尊
若得此经者 是名佛法王⁴⁰
则为世间护 诸佛之所叹
若有持是经 是人名法王
是为世间眼 应赞如世尊

尔时，世尊说此经已，金刚慧及诸菩萨，四众眷属，天、人、乾闥婆、阿修罗等，闻佛所说，欢喜奉行。

大方等如来藏经

⁴⁰ 大正藏：主

● 结诵仪

补阙真言

(三遍)

南無喝啰怛那. 哆罗夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛拿. 吽. 泼抹拿. 娑婆诃.

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

礼佛发愿文

(一遍)

归命十方调御师 演扬清净微妙法
三乘四果解脱僧 愿赐慈悲哀摄受

但(某甲)自违真性，枉入迷流。随生死以飘沉，逐色声而贪染。十缠十使，积成有漏之因；六根六尘，妄作无边之罪。迷沦苦海，深溺邪途。著我耽人，举枉措直。累生业障，一切愆尤。仰三宝以慈悲，沥一心而忏悔。

所愿能仁拯拔，善友提携。出烦恼之深源，到菩提之彼岸。此世福基命位，各愿昌隆；来生智种灵苗，同希增秀。生逢中国，长遇明师。正信出家，童真入道。六根通利，三业纯和。不染世缘，常修梵行。执持禁戒，尘业不侵。严护威仪，蝇飞无损。不逢八难，不缺四缘。般若智以现前，菩提心而不退。修习正法，了悟大乘。开六度之行门，越三祇之劫海。建法幢于处处，破疑网于重重。降伏众魔，绍隆三宝。承事十方诸佛，无有疲劳。修学一切法门，悉皆通达。广作福慧，普利尘沙。得六种之神通，圆一生之佛果。然后不舍法界，遍入尘劳。等观音之慈心，行普贤之愿海。他方此界，逐类随形。应现色身，演扬妙法。泥犁苦趣，饿鬼道中，或放大光明，或现诸神变，其有见我相，乃至闻我名，皆发菩提心，永出轮回苦。火镬冰河之地，变作香林；饮铜食铁之徒，化生净土。披毛戴角，负债含怨，尽罢辛酸，咸沾利乐。疾疫世而现为药草，救疗沉痾；饥馑时而化作稻粱，济诸贫馁。但有利益，无不兴崇。次期累世冤亲，现存眷属，出四生之汨没，舍万劫之爱缠。等与含生，齐成佛道。虚空有尽，我愿无穷。情与无情，同圆种智。

回向偈

(一遍)

诵经功德殊胜行 无边胜福皆回向
普愿沉溺诸有情 速往无量光佛刹
十方三世一切佛 一切菩萨摩诃萨
摩诃般若波罗蜜

回向偈

(一遍)

愿以此功德 庄严佛净土
上报四重恩 下济三途苦
若有见闻者 悉发菩提心
尽此一报身 同生极乐国

三皈依

(一遍)

自皈依佛，当愿众生，体解大道，发无上心。
自皈依法，当愿众生，深入经藏，智慧如海。自
皈依僧，当愿众生，统理大众，一切无碍，和南
圣众。

南无护法韦驮尊天菩萨



ཡིག་ཉི་ཤུ་རྩ་དུག་པ་འདི་དཔེ་ཆ་འཛིན་པ་དུ་བཞག་ན་དཔེ་ཆ་དེ་ཅི་འདྲར་
བཀོམས་ཀྱང་ཉེས་པ་མི་འབྱུང་བར་འཇམ་དཔལ་ཚ་རྒྱུད་ལས་གསུངས་སོ།།

此咒置经书中可灭误跨之罪